



Borgarráð

Samþykkt velferðarráðs um tímabundna fjölgun rýma á Droplaugarstöðum

Á fundi velferðarráðs þann 15. apríl 2026 var lögð fram svohljóðandi tillaga sviðsstjóra, dags. 13. apríl 2026, um tímabundna fjölgun rýma á Droplaugarstöðum:

Lagt er til að velferðarráð samþykki að heimila tímabundna tvísetningu í hjúkrunarrýmum á Droplaugarstöðum þar sem aðstæður leyfa, í þeim tilgangi að fjölga biðrymum og bregðast við auknu álagi á Landspítala. Gert er ráð fyrir að með þessu megi fjölga rýmum um allt að þrjú til sex, með fyrirvara um mönnun og aðstæður á hverri einingu. Um svokölluð biðrymi væri að ræða. Heimildin gildi í allt að sex mánuði, með möguleika á framlengingu tvisvar sinnum um þrjá mánuði í senn, að mati stjórnenda Droplaugarstaða. Tillagan felur ekki í sér auka kostnað fyrir velferðarsvið.

Greinargerð fylgir tillögunni.
Tillagan var samþykkt.

Fulltrúar Samfylkingarinnar, Pírata, Sósíalístaflokks Íslands og Flokks fólksins lögðu fram svohljóðandi bókun:

Velferðarráð Reykjavíkurborgar samþykkir tillögu sviðsstjóra velferðarsviðs um að heimila tímabundna tvísetningu í hjúkrunarrýmum á Droplaugarstöðum þar sem aðstæður leyfa, í þeim tilgangi að bregðast við miklu álagi á Landspítala og styðja við samfellu í þjónustu. Ráðið leggur áherslu á að um sé að ræða tímabundna neyðarráðstöfun, sem sett er fram að beiðni heilbrigðisráðuneytisins og miðar að því að mæta sérstaklega þungri stöðu í bráðþjónustu og felur ekki í sér auka kostnað fyrir velferðarsvið. Gert er ráð fyrir að hægt verði að fjölga biðrymum um allt að þrjú til sex rými, með fyrirvara um mönnun og aðstæður á hverri einingu. Fulltrúarnir áréttu að almennt sé miðað við einbýli á hjúkrunarheimilum, enda styður slíkt fyrirkomulag við lífsgæði, reisn og velferð íbúa. Sú heimild sem hér um ræðir gildir því í allt að sex mánuði, með möguleika á framlengingu allt að tvisvar sinnum um þrjá mánuði í senn. Ráðið telur mikilvægt að Reykjavíkurborg sýni í þessu samhengi samábyrgð með heilbrigðiskerfinu í heild, þegar tímabundnar og afmarkaðar aðgerðir geta létt á álagi í bráðþjónustu, að því gefnu að öryggi, mönnun og viðeigandi aðstæður fyrir íbúa og starfsfólk séu ávallt tryggð.

Fulltrúar Sjálfstæðisflokksins og Framsóknarflokksins lögðu fram svohljóðandi bókun:





Fulltrúar Sjálfstæðisflokksins og Framsóknar taka undir að við þær aðstæður sem uppi eru í heilbrigðiskerfinu geti verið nauðsynlegt að grípa til tímabundinna ráðstafana til að bregðast við álagi á Landspítala. Mikilvægt er þó að slíkar ákvarðanir séu teknar í góðu samkomulagi við skjólstæðinga Droplaugarstaða. Jafnframt leggja fulltrúarnir ríka áherslu á að um sé að ræða skýrt afmarkaða neyðarráðstöfun. Þótt heimildin geti varað í allt að 12 mánuði er mikilvægt að hún verði ekki framlengd umfram það, enda ber stjórnvöldum, bæði ríki og Reykjavíkurborg, að nýta þann tíma til að finna varanlega lausn á þeim vanda sem uppi er. Tryggja þarf að heimild til tvísetningar verði felld niður um leið og aðstæður leyfa, enda er einbýli grundvallarforsenda fyrir lífsgæði, reisn og velferð íbúa hjúkrunarheimila. Slíkar aðgerðir mega ekki verða varanleg lausn á kerfisvanda í heilbrigðiskerfinu.

Málið er hér með sent borgarráði til kynningar.

Virðingarfyllst,

Rannveig Einarsdóttir
sviðsstjóri velferðarsviðs

Hjálagt:

Tillaga sviðsstjóra um tímabundna fjölgun rýma á Droplaugarstöðum, lögð fram á fundi velferðarráðs 15. apríl 2026.



Reykjavík



Reykjavík, 13. apríl 2026

VEL26040034

TILLAGA

Viðtakandi: Velferðarráð

Sendandi: Rannveig Einarsdóttir, sviðsstjóri velferðarsviðs

Efni tillögu: Tímabundin fjölgun rýma á Droplaugarstöðum

Lagt er til að velferðarráð samþykki að heimila tímabundna tvísetningu í hjúkrunarrýmum á Droplaugarstöðum þar sem aðstæður leyfa, í þeim tilgangi að fjölga biðrymum og bregðast við auknu álagi á Landspítala. Gert er ráð fyrir að með þessu megi fjölga rýmum um allt að þrjú til sex, með fyrirvara um mönnun og aðstæður á hverri einingu. Um svokölluð biðrymi væri að ræða. Heimildin gildi í allt að sex mánuði, með möguleika á framlengingu tvisvar sinnum um þrjá mánuði í senn, að mati stjórnenda Droplaugarstaða. Tillagan felur ekki í sér auka kostnað fyrir velferðarsvið.

Greinargerð:

Heilbrigðisráðuneytið, fyrir hönd heilbrigðisráðherra, hefur með erindi dags. 17. febrúar 2026, óskað eftir því við Reykjavíkurborg að gripið verði til tímabundinna ráðstafana til að bregðast við þungri stöðu á Landspítala, meðal annars með fjölgun rýma á hjúkrunarheimilum þar sem aðstæður leyfa.

Á Droplaugarstöðum er mögulegt, við tiltekna aðstæður, að tvísetja í herbergjum. Slík nýting er háð því að hjúkrunarrými losni, að mönnun sé nægjanleg og að aðstæður á viðkomandi einingum séu til þess fallnar. Áætlað er að með þessum hætti megi fjölga rýmum tímabundið um þrjú til sex. Um væri að ræða biðrymi sem nýtt yrðu meðan álag er mikið á Landspítala. Þegar ástand batnar yrðu rýmin aftur nýtt sem almenn hjúkrunarrými í einbýli. Heimildin um tvíbýli væri samþykkt til sex mánaða með heimild til að framlengja allt að tvisvar sinnum um þrjá mánuði sé þess óskað af hálfu heilbrigðisráðuneytis eða Sjúkratrygginga Íslands.

Velferðarsvið leggur áherslu á að um tímabundna neyðarráðstöfun sé að ræða. Almenn er miðað við að íbúar á hjúkrunarheimilum hafi aðgang að einbýli, enda styður það við lífsgæði og velferð þeirra.

Tillagan er sett fram í samræmi við framangreinda beiðni og miðar að því að styðja við samfellu í þjónustu og draga úr álagi á bráðapjónustu.



Reykjavík